

Erindisbréf skóla- og fræðslunefndar

I. Verkefni nefndarinnar

1. gr.

Skóla- og fræðslunefnd starfar í umboði bæjarstjórnar að skóla- og fræðslumálum samkvæmt lögum og reglugerðum er þar að lúta og eftir því sem nánar er kveðið á um í þessu erindisbréfi sem er gert í samræmi við samþykkt um stjórn Snæfellsbæjar.

2. gr.

Skóla- og fræðslunefnd gerir tillögur til bæjarstjórnar um stefnumörkun á sviði skóla- og fræðslumála. Nefndin fylgist með að unnið sé að settum markmiðum í málaflokknum, veitt sé góð þjónusta og starfsemin sé skilvirk og hagkvæm.

3. gr.

Helstu verkefni skóla- og fræðslunefndar eru:

- að hafa eftirlit með að öll börn í Snæfellsbæ njóti lögboðinnar fræðslu og umönnunar,
- að hafa eftirlit með stofnunum, sem heyra undir nefndina, en í því felst annars vegar stuðningur við nemendur og fjölskyldur þeirra og hins vegar stuðningur við starfsemi leik- og grunnskóla og starfsfólk þeirra,
- að gera tillögur að framkvæmdum fyrir fjárhagsáætlun til bæjarstjórnar um þá liði sem falla undir verksvið nefndarinnar í samstarfi við viðkomandi starfsmenn,
- að fylgja því eftir að unnið sé samkvæmt menntastefnunni og öðrum stefnum sem heyra undir starfssviðið,
- að staðfesta starfsáætlun allra skóla sveitarfélagsins,
- að fylgjast með framkvæmd náms og kennslu í sveitarfélaginu og gerð skólanámskrár og gerir tillögur til skólastjóra og/eða sveitarstjórnar um umbætur í skólasterfi,
- að fylgjast með og stuðla að því að nemendum og skólum sé tryggður aðgangur að skólaþjónustu og að jafnan sé fyrir hendi viðeigandi húsnæði fyrir kennslu og annar aðbúnaður,
- að stuðla að tengslum og samstarfi leik- og grunnskóla annars vegar og grunnskóla og framhaldsskóla hins vegar,
- að stuðla að samþættingu þjónustu sem veitt er á vegum skólakerfisins við aðra þjónustu sem er veitt í þágu barna,
- að hafa eftirlit með innra og ytra gæðamati skólanna og fylgir eftir umbótaáætlun í kjölfar þess,
- að gera tillögu til bæjarstjórnar um skólagjöld Tónlistarskólans fyrir fjárhagsáætlun hvers árs,

- að vera til ráðgjafar í skóla- og fræðslumálum og gera tillögur um úrbætur á því sviði sem undir hana heyrir,
- að fjalla um þau mál sem bæjarstjórn felur nefndinni hverju sinni.

Sé nefndinni ekki falið að taka fullnaðarákvörðun um mál, skv. lögum eða erindisbréfi þessu, teljast ályktanir hennar tillögur til bæjarstjórnar, enda þótt þær séu orðaðar sem ákvarðanir eða samþykktir nefndar. Slíkar ákvarðanir þurfa því staðfestingu bæjarstjórnar.

4. gr.

Skóla- og fræðslunefnd hefur eftirlit með framkvæmd eftirfarandi laga og reglugerða byggðra á þeim, eins og þau eru hverju sinni og að því marki sem lögin setja skyldur á herðar sveitarfélaga:

- a) lög um grunnskóla nr. 91/2008
- b) lög um leikskóla nr. 90/2008
- c) lög um fjárhagslegan stuðning tónlistarskóla nr. 75/1985
- d) önnur lög og reglugerðir sem á hverjum tíma tengjast verkefnum nefndarinnar.

5. gr.

Skóla- og fræðslunefnd starfar í samræmi við samþykktir og reglur sem bæjarstjórn hefur sett eða kann að setja um verkefni hennar, svo sem menntastefnu Snæfellsbæjar. Það á einnig við um samninga og samstarf á þessum vettvangi við önnur sveitarfélög.

Nefndin skal eiga samstarf við aðrar nefndir bæjarfélagsins, eftir því sem málefni gefa tilefni til á hverjum tíma.

II. Skipan nefndarinnar

6. gr.

Bæjarstjórn skal á fyrsta eða öðrum fundi að afloknum sveitarstjórnarkosningum kjósa fimm nefndarmenn í skóla- og fræðslunefnd til fjögurra ára og fimm til vara. Nefndin kys sér formann, hafi hann ekki verið skipaður af bæjarstjórn, og varaformann á fyrsta fundi sínum.

7. gr.

Formaður skóla- og fræðslunefndar stjórnar fundum nefndarinnar skv. ákvæðum IV. kafla samþykktar um stjórn Snæfellsbæjar og sér um að allt fari þar löglega og skipulega fram. Hann úrskurðar í ágreiningsmálum sem upp kunna að koma út af fundarsköpum en skjóta má úrskurði hans til úrlausnar nefndarinnar. Fundarmönnum er skylt að lúta valdi formanns að því er varðar fundarsköp og góða reglu.

Formaður sér um boðun funda. Fundarboðun skal vera skrifleg og tilgreina fundarstað, tíma og dagskrá. Fundarboð skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

8. gr.

Skóla- og fræðslunefnd heldur að jafnaði einn fund í mánuði. Aukafundi skal halda eftir þörfum að ákvörðun formanns eða ef a.m.k. tveir nefndarmenn óska þess. Skóla- og fræðslunefnd kemur saman fyrir luktum dyrum á fastákveðnum fundartíma, samkvæmt fundaplani. Skal nefndin gera samþykkt um þennan fundartíma á sínum fyrsta fundi.

9. gr.

Auk kjörinna fulltrúa skóla- og fræðslunefndar eiga eftirtaldir rétt til setu á fundum nefndarinnar með málfrelsi og tillögurétt:

- a) einn fulltrúi grunnskólastjóra
- b) einn fulltrúi kosinn úr hópi fastráðinna kennara
- c) einn fulltrúi foreldra, sbr. 13. gr. laga um grunnskóla nr. 91/2008
- d) einn fulltrúi leikskólastjóra
- e) einn fulltrúi úr hópi starfsmanna leikskólanna
- f) einn fulltrúi tilnefndur af foreldrafélagi barna í leikskólanum,
- g) skólastjóri tónlistarskólans
- h) formaður foreldraráðs tónlistarskólans
- i) fulltrúi ungmennaráðs

Formaður skóla- og fræðslunefndar boðar framangreinda áheyrnarfulltrúa á fundi nefndarinnar þegar þau málefni eru á dagskrá sem áheyrnarfulltrúi er tilnefndur til að gæta hagsmuna fyrir.

Nefndinni er heimilt að kalla til sín sérhvern þann sem tengist málum sem fjallað er um.

Þá á bæjarstjóri rétt á að sitja fundi nefndarinnar með málfrelsi og tillögurétt.

III. Yfirstjórn skóla- og fræðslumála

10. gr.

Formaður skóla- og fræðslunefndar er í forsvari fyrir skóla- og fræðslunefnd um stefnumótun og ákvarðanir hennar eftir því sem við á. Bæjarstjóri ber ábyrgð á fjármálum málaflokksins og framkvæmd ákvarðana nefndarinnar.

IV. Fundarsköp nefndarinnar

11. gr.

Um fundarsköp á fundum skóla- og fræðslunefndar gilda ákvæði sveitarstjórnarlaga og samþykkt um stjórn Snæfellsbæjar.

12. gr.

Fundargerðir skóla- og fræðslunefndar skulu tölvuskráðar. Við skráningu skal fylgja þeim meginreglum sem gilda um skráningu fundargerða bæjarstjórnar, sbr. 16. gr. í samþykkt um stjórn Snæfellsbæjar.

Í tölvuskráða fundargerð skal færa:

- a. fundartíma og fundarstað,
- b. nöfn aðalmanna og varamanna sem sækja fundinn,
- c. nöfn starfsmanna sem sækja fundinn,
- d. heiti og númer fundarefna sem tekin eru fyrir,
- e. greinargóða lýsingu á hverju fundarefni,
- f. bókanir nefndarinnar eða einstakra fundarmanna um fundarefni þar sem það á við,
- g. í fundargerð skal einnig koma fram ef fundarmenn víkja af fundi eða koma til fundar eftir að hann hefst.

Í lok fundar skal tölvuskráð fundargerð undirrituð rafrænt af fundarmönnum.

Strax að loknum fundi kemur ritari nefndarinnar fundargerðinni til bæjarritara sem leggur hana fram með dagskrá næsta bæjarstjórnarfundar.

Fundargerðir skóla- og fræðslunefndar eru birtar að afgreiðslu lokinni á heimasíðu Snæfellsbæjar.

13. gr.

Fundur telst ályktunarhæfur ef meirihluti nefndarmanna er mættur á fundi. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

Ályktanir skóla- og fræðslunefndar til bæjarstjórnar og bæjarráðs skal ætíð senda í sérstöku erindi.

V. Hæfi, réttindi og skyldur nefndarmanna og annarra fundarmanna

14. gr.

Um réttindi og skyldur nefndarmanna gilda, eftir því sem við á, ákvæði IV. kafla sveitarstjórnarlaga nr. 138/2011, sbr. einnig IV. kafla í samþykkt um stjórn Snæfellsbæjar. Nefndarmönnum er skylt að kynna sér þessi ákvæði.

15. gr.

Um hæfi nefndarmanna í skóla- og fræðslunefnd gilda ákvæði 19. gr. sveitarstjórnarlaga nr. 45/1998, II. kafla stjórnsýslulaga nr. 37/1993 og samþykktar um stjórn Snæfellsbæjar.

Um hæfi annarra sem sitja fundi skóla- og fræðslunefndar gilda ákvæði II. kafla stjórnsýslulaga nr. 37/1993.

Nefndarmaður skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

16. gr.

Nefndarmönnum er skylt að sækja alla fundi skóla- og fræðslunefndar nema lögmæt forföll hamli svo sem önnur brýnni skyldustörf eða veikindi. Sé nefndarmaður í skóla- og fræðslunefnd forfallaður um stundarsakir skal hann tilkynna eða láta tilkynna forföllin til formanns og boða varamann sinn á fund.

17. gr.

Nefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum eða eðli máls. Þagnarskylda helst áfram eftir að nefndarmaður lætur af þeim störfum. Þetta ákvæði á einnig við um aðra sem boðaðir eru til fundar.

VI. Eftirfylgni

18. gr.

Nefndarformaður og aðrir nefndarmenn skulu snúa sér til bæjarstjóra með eftirfylgni staðfesta samþykktu nefndarinnar og þannig tryggja að tekin sé afstaða til þeirra og þær framkvæmdar, í þeim tilfellum sem við á.

VII. Gildistaka

19. gr.

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnsýslulögum nr. 37/1993 og samþykkt um stjórn Snæfellsbæjar.

Erindisbréf þetta var staðfest á fundi bæjarstjórnar 3. september 2026 og tekur gildi sama dag.

Snæfellsbær 3. september 2026

Kristinn Jónasson, bæjarstjóri